

桐城耆舊傳

桐城耆舊傳卷七目錄

邑後學馬其昶通伯撰

錢田閒先生傳弟六十四

白渠先生

馬兵部傳弟六十五

姚端恪公傳弟六十六

陳兵部王參政吳提學傳弟六十七

程太常吳吏部龍修撰孫糧道傳弟六十八

戴成都劉廣昌楊邯鄲錢蒼梧傳弟六十九

姚開化階州峽江傳弟七十

江參政彭副使孫東昌傳弟七十一

左潞安遷江建陽傳弟七十二

左硯農王砭崖周筆峰三先生傳弟七十三

諸方張葉傳弟七十四

方氏三詩人傳弟七十五

潘木崖先生傳弟七十六

張湖上先生傳弟七十七

張獅崖李古塘吳伯颺傳弟七十八

錢田閒先生傳弟六十四

白渠先生

桐城耆舊傳七

錢先生諱澄之字飲光初名秉鐙字幼光號西頑道人父諱志立字爾卓明萬厯閒諸生師事趙樅江學行甚高嘗闢館聚徒講易五子秉鐙字幼安秉錡字湘之並有文譽先生其季也少以名節自勵有御史某巡按至皖盛儀從謁孔子廟諸生迎迓門外先生忽前扳車御史大駭止車因抗聲數其穢行御史故闔黨方自幸脫逆案內懼不敢究其事先生以此名聞是時復社幾社始興比郡中主壇坫者宣城沈眉生池陽吳次尾吾邑則先生及方禽山密之諸公而先生又與陳臥子夏彝

仲輩聯雲龍社以接武東林先生體貌偉然好飲酒縱
談經世之略嘗思冒危難立功名南都立新主阮大鍼
柄用刊章捕治黨人先生於是亡命走浙閩入粵崎嶇
絕險猶數從鋒鏑閒支持名義不少屈漳浦黃忠端公
薦諸唐王授吉安府推官尋改延平府桂王時擢禮部
主事己丑特試授翰林院庶吉士兼誥敕撰文指陳皆
切時弊忌者眾乃乞假閒道歸里結廬先人墓旁環廬
皆田也自號曰田閒箸田閒易學十二卷詩學十二卷
四庫皆箸錄卒年八十二先生嘗問易漳浦依京房
邵康節說究極數學其後兼求義理其治詩遵用小序

首句於名物訓詁山川地理尤詳自謂著易學詩學成
思所以翊二經者而得莊周屈原乃復著莊屈合詁八
卷蓋先生生值末季故離憂抑鬱發憤著書而以莊繼
易以屈繼詩也又有藏山閣詩集十卷文集三十卷初
先生避禍吳中長子法祖字孝則隨母方蹤跡之遇兵
亂方赴水死先生後入閩孝則家居以盜入後母室奔
衛母被盜死從孫源啟字致一號信齋源逢字湘舟號
鐵華兄弟齊聲信齋工繪事書法宗華亭鐵華有澡雪
齋詩錢氏自田閒以經學聞其後乾嘉閒有白渠先生
者亦深於經而無所知名

白渠先生諱彝字秉之以經學教授四十餘年老乃得
儀徵訓導未赴官卒於諸經皆有纂述箸易概二十二
卷書概二十二卷詩概三十二卷周官概二十卷儀禮
概四十卷禮記概四十六卷孝經概二卷都三百卷輯
錄先儒成說皆手寫字畫拙醜其自爲說則別出之曰
經疑七卷有刊本子榛能傳其業

馬其昶曰先生負瓌特之才鬱無所試以墳典自娛孳
經爲文視先代諸公堂廡大別望溪少時承其緒論後
遂蔚爲儒宗當先生眾辱御史其猶明之遺風哉而卒
以經學文章開啟學派亦考流別者所宜知也白渠經

概稿本今存余家

馬兵部傳第六十五

先九世伯祖兵部公諱之瑛字倩若號正誼幼孤與弟
恕菴皆依祖太僕公恕菴公諱之瓊字孔璋兄弟篤愛
也痛不逮事父乃益致孝於祖太僕嘗臥疾半載兄弟
更替侍側不暫違恕菴性剛直多任卹之行以諸生終
而公淵雅有德量舉崇禎十三年進士知廣東陽江縣
初至訟者獻酒一甌實皆金也察其異卻之卒置於理
秩滿遷去或持上金卮一雙拜曰公在官民不敢有私
謁今願報德笑曰此豈山陰一錢邪亦卻之度嶺聞南

渡政亂避居池陽順治十八年以薦授山東定陶令康熙八年課最擢兵部督捕主事未行而卒祀定陶名宦公治定陶值李化鯨陷城後四郊濯莽絃誦寂如單騎詣賊壘降其魁餘黨平縣多豪族舊額賦地隱占三萬餘畝前令因以虛額加賦公履畝清丈盡除虛加益捐金給牛種數年報墾踰千頃賦均荒闢農事既舉加意教化月有課季有考親自率厲又平反姦民造僞印事發諸連坐者百餘家同縣潘木崖先生嘗至劉家口渡河抵曹縣距定陶四十里所遇曹父老問曹民安否曰噫嘻曹何敢望定陶定陶天堂也問其故曰陶有好官

曰馬公自公視事上官但以教下縣胥吏不煩至卽至亦恍令清嚴無敢犯又爲縷述他善政曰定陶天堂也曹何敢望潘先生聞而歎曰政之化民其速邇邪觀曹民慕歎若此卽定陶可知矣公居鄉有大興除必以身任流寇之難預請具矢石繕樓櫓厚積聚偕諸士紳及弟恕菴捍禦甚力城卒以完公強記博覽尤工詩歌方儀衛謂足與江左三家方駕箸秫莊集四十卷平居口不言詩先是天啟時公及從父爾升子翼從兄君璧輩并以文采知名號怡園六子怡園者太僕別業也三人皆諸生爾升諱懋學重躬修譔下學編高忠憲公歎爲

篤實子翼諱懋贊左良玉兵亂入皖不屈死君璧諱之
瑜與蔣臣輩知名復社晚棄儒冠卜居湖濱時時御小
艇投竿以漁有耦耕漫筆琴旨湖上草堂詩兵部六子
教思自有傳恕菴二子長爲西屏公諱國志字勳公以
貢生考授州同知箸懷亭詩集西屏子爲雙岑公諱庶
字少游以清正見推鄉里博涉子史箸懷亭瑣記四卷
其昶謹按先太僕公一子是爲孝子公孝子公二子長
兵部次恕菴其昶出恕菴公後自太僕以下稱中二房
中二房最相親不似他族服盡則疎以余家丁少因加
厚又中二房同祖太僕故也風化日漓懼後生不曉前

規乃略述於此

姚端恪公傳第六十六

姚公諱文然字弱侯號龍懷崇禎十六年進士改庶吉士流賊陷都城閒道歸隱居養親 本朝順治三年以安慶巡撫李猶龍薦除國史院庶吉士改禮科給事中數言政事便宜其才施無所不通而於錢穀刑律尤精務爲國家崇寬仁惜大體鞏固基本初入諫垣卽疏請嚴敕撫按遵 恩詔清刑獄勿任有司稽延或條赦外有可矜疑原宥者許專疏上陳畿南盜熾公言直隸與山東河北接壤盜軼境外難越捕請改保定巡撫爲

總督兼轄直隸山東及河南懷慶衛輝彰德三府又請
 定例會試下第舉人得揀選皆議行轉工科給事中八
 年 章皇帝親政求直言大臣以巡按澄清無效議停
 止公言巡按不得人不聞都察院大臣指劾反使 朝
 廷察吏安民之大典坐是罷廢徇私溺職莫此爲甚願
 賜 召對面議同異疏入憲臣及御史甄別有差臺班
 一肅是年西北大熟江浙水災鉅公請改折漕米以災
 輕重定改折多寡明布折漕規則防官吏爲姦改折外
 重徵火耗或先已徵米又收折價及重折輕解諸弊
 上嘉納之十年遷兵科都給事中公旣以忠誠自竭所

請多施行而性故澹退未幾乞養歸康熙五年起補戶科六年疏請嚴禁川楚諸省官吏不得藉採木搜取民間屋材墓樹又言一部可結之事宜一部徑結一疏可結之事卽宜一疏通結如各省錢糧考成已報完者部臣議覆時可卽與開復以省奏牘報可九年 命以四品服俸仍任給事中凡臺班內陞例皆回籍候補內陞畱任自是始公厯言官惟戶科最久擢官皆在法司十年廷鞫總督周有德編修陳志紀而兩江總督麻勒吉亦逮繫至都先是公疏請免大臣鎖禁城門存國體從之及是復言麻勒吉情罪未決不宜遽辱 上避其言

命自後赴鞫者概免係縲著爲令擢副都御史遷刑部
侍郎十二年調兵部督捕侍郎充會試副考官尋以京
口將軍柯永綦爲副都統張所養奏劾奉 命往鞫得
實永綦罷任是年遷左都御史十三年長沙新降復叛
公言長沙距辰沅近當擒獻賊使之際必請兵救援彼
見荊州武昌頓兵不渡謬謂國家棄此土於度外一旦
賊使再至望絕而降固非得已宜深原其情以開反正
之路又言耿精忠孫延齡與吳三桂相脣齒中間獨隔
阻廣東耿逆將士舊駐其地熟悉形勢恐乘不意夾攻
則廣東勢危而江西毗連閩粵若賊侵據贛州南安則

餉絕郵梗宜駐重兵通聲援 上從其議是時秦中已
定獨平涼未下公言從此進討湖南兵勢有餘請停調
蒙古關東兵而益堅招撫明大信以徠平涼前後所建
白甚眾不少依違又其言從容諷諭故聽者易入而尤
推本 君身倦倦以節愼起居爲言 孝仁皇后梓宮
奉安鞏華城盛暑 車駕屢幸密疏切諫且引唐太宗
作層觀臺望昭陵納魏徵諫泣而毀觀事語甚切至
上亦受之不拂也十五年擢刑部尙書當是時 國家
規制初立 天子大聖寬仁公矜恤民命惟恐一物不
得其所於是乃稱曰刃殺人一時例殺人萬世其可忽

哉因益推明律意虛心鉤稽不飲法不市恩如錘之稱物不有杪忽之爽且寧於其出也微昂入也微沈所以廣上恩德於無窮也每退食輒攜招冊盈尺以歸校擬恆至夜分嘗刺一人非法爭之不得退而長跼自責在位二年薨年五十九 賜祭葬諡端恪祀鄉賢公爲人精密有大量養親家居近十年不以一事干有司至繫地方利害則移書反覆必得請乃已晚歲洞明生死泊然無所戀繫獨其惻隱牢結病中猶口授疏請更定二例恐其或有冤濫也箸疏稿八卷文集十卷詩集十二卷白雲語錄六卷雜箸十二卷雍正八年入祀賢良

祠 特勅加祭一壇建專祠本邑歲時有司致祀

馬其昶曰世言慈不刑懦不兵豈以二者之用非猛鷲
莫勝邪然三世爲將道家所忌及司刑名法比者或往
往子孫卽廢又豈二者之不可爲邪公之宅心何其哀
矜惻怛之甚也後嗣彌盛名賢相踵我 朝刑律定自
公手凡前代殘苛遂以剗除澤流無極可謂大仁余讀
公病中日記一冊儒生訟過自刻莫能及也

王參議陳兵部吳提學傳第六十七

王公諱大初字以介一字定爾號願五幼慧涉目成誦
年十二畢六經史漢方廷尉以公輔器期之順治四年

進士授編修恥隨俗奔競乞病歸家居九年閉門靜修亦時爭利害於官府止防兵革里役鄉里賴之功令

勅補乃起江西參議督視漕務罷一切苛細政暇輒自課士專以譚藝爲樂獎成甚衆尋復告歸築西園日觴詠其中箸西園雜錄有懷堂集學者稱文靜先生子珙字其人號蒿伊雍正閒以貢生爲樂城令歲革羨餘千金浚井數百溉田民祠之遷紹興府通判求百年湮廢之蹟開濬紹興三江門及杭州城河士民撰濬江頌勒石西湖之孤山特旨命佐大臣治下河水患專濬丁溪草堰省帑金四萬擢彰德府致仕歸詩才雄健能世

其家彰德孫諱洛字仲涵甚有文譽雍正十一年進士
吏部郎中有瀾靈集懷坡詩鈔初王氏遷桐城至參議
七世矣其兄弟行有諱文燦者字蔚然生三歲父熒爲
史忠正公裨將擊賊遇害母攜之轉徙十年忽相失散
既寄籍粵西入蒼梧學徒步訪母得相遇於雲南曲靖
因偕歸蒼梧康熙二年中廣西舉人任廣東清遠縣政
聲大起以母老改象州學正子地錕三十五年舉人孫
瀚滄雍正十一年同榜進士均蒼梧籍

陳公諱焯字默公號越樓父祀鄉賢諱朝棟號皤石明
萬厯閒諸生家世儒學以爲士苟操行弗篤不獨象山

慈湖之徒流爲禪趨尊事程朱亦無當也父有嬖姬強
名他人子揣父意推產讓之箸三易露箋清越樓日錄
各十卷公之生也母夢綠星掬手中寤而生因名其居
曰綠星七歲能屬文年二十遊吳越閒作寶帶橋望月
歌吳人王子稼譜入管絃明末建海屯之議兵科陳公
子龍上其策授以部職辭不就國朝以拔貢生爲中
書舍人退請與鄉試順治九年進士殿試讀卷官擬進
呈第一以曾官內閣引嫌改置第五授兵部主事乞歸
養親歿廬墓三年湯文正公嘗展謁墓所又於城內西
山高處構滌岑王文簡公過縣畱宿滌岑論詩甚驪風

雨中登其閣望龍眠諸山也工於詩善草隸箸滌峯詩
文前後集十卷又輯古今賦會若干卷宋元詩會一百
卷采錄九百餘家 文淵閣箸錄謂足與吳之振顧嗣
立二書相輔嘗修安慶府志江南通志年七十四卒學
者稱文潔先生子堂謀字大匡號絡翁歲貢生爲束鹿
縣丞巡撫于清襄公器之及督河奏以自隨詩文博麗
與陳檢討維崧吳祭酒偉業爲忘年交箸北谿詩集次
子臺略字綏四縣學生友孝慈仁潛心儒學喜言易有
易學辨疑子曷鑑雍正二年進士臨海令同時有陳綱
菴陳二如皆不知於兵部何族屬也綱菴諱光字季白

縣廩生制舉文爲一時楷式晚歲窮研性命箸治平要覽古事彙考等書二如諱式字質生康熙初貢生寓白門與里人胡栲峯何道岑張蔚喬吳南蒼方樓岡邵村姚丹楓龍懷盤青輩爲潛園十五子之會平生耆杜詩箸問齋杜意十五卷栲峯諱如牲字子兌順治八年副貢生考授浙江臨海令時防臺兵數萬所過縣出民夫昇之多累死因條陳大府通得免役子天章正宗並知名時在下能詩者又有諸生丁漢公諱倬字彼雲好古博學與錢飲光方爾止善有髻山堂集二十四卷子舟嶽高才早逝有掃煙樓遺詩許畫林諱七雲字耕華康

熙四十六年以諸生進迎 鑾詩三十章有芋畹集越
遊草周鶴田諱南字汝爲諸生喜言經世之略以父磐
石明亡殉義死遂不求仕 聖祖御極伏闕陳便宜十
事給事中胡悉甯劾奏之 朝旨嚴飭悉甯謂其議有
可採不以違禁致罪後客粵帥幕一日飲酒高會帥出
歌者十餘人持扇索詩因援筆寫付各詠七言一律坐
客皆驚其工速有鶴巢詩文鈔王蜀隱諱之楨字以寧
諸生負才豪宕尤與龔芝麓尙書善其子伯通昆季皆
出其門劉雲芝諱允升字巖遇亦諸生少時賦七言百
韻詩上合肥李文定公文定奇之館於家其子丹壑編

修自謂才不及也有懷古堂詩稿

吳公諱子雲字霞蒸號五崖高甸之吳分兩宗曰寶慶曰榮華公寶慶股也祖諱汝亮貧不廢學父諱先攀號恂菴明末總鎮駐師皖城麾下馬進寶肆虐縣境民憤格鬪進寶羅織三百餘人以叛聞恂菴力白其冤乃免公登順治十二年進士歷廬州府教授國子監助教勤於訓課再遷戶部郎中河南提學道增秩以參議用年五十遽歸能孝事繼母其督學及同考鄉會甚有鑒衡之譽制府石公文桂尙書翁公叔元閣學楊公瑄修撰彭公定求皆其所得士也弟玉藻字冰持以恩貢授內

閣中書兄提學歿遂乞養歸父母皆年逾九十旣終喪
乃起赴官補成都同知攝雅州溫江屏山皆以清廉著
聲提學曾孫元念字在宮乾隆中知雲南建水州有土
官亡其弟欲奪其子位饋酒置金其中君召至堂啟甕
出金令建橋而斷以予襲鄰州盜逸至境獲之不自爲
功還其州官擢戶部員外郎告歸戶部從子臣弼字夢
霖乾隆四十五年副貢官五河教諭孝友端謹鄉里服
其識量

馬其昶曰參議兵部清操高節雅癖於文各有令子箕
裘克紹提學韜榮餘慶在後皆一時之傑也滌岑據全

郭之勝他處登望或止半面此獨得其全今其遺址爲法蘭西教堂

程太常吳吏部龍修撰孫糧道傳弟六十八

程公諱芳朝初名鉅字其相號立菴順治四年進士

殿試一甲第二授內國史院編修遷秘書院修撰繙譯五經九年會試同考轉左春坊左諭德十一年提督北直學政遷國史院侍講學士初安南國明嘉靖中降安南都統使康熙三年黎維禔卒公以侍讀學士充正使往安南諭祭仍冊封黎維禔爲安南國王尋進詹事府少詹事轉太常寺卿嘗奉宣於御前伏几作大字

上嘉其端勁意方嚮用而公遽移疾歸年六十六卒子仕字松皋官建甯知府有梅齋詩集吾邑科目昉唐曹夢徵及宋李伯時兄弟至明而大盛自永樂甲申劉瑩第進士訖崇禎癸未凡八十人入我朝太常首以一甲二名及第至今二百六十年又一百五十三人其舉於鄉者明一百六十五人我朝六百二十八人自太常後其以一甲二名及第者二人康熙己丑戴編修名世戊戌張宗伯廷璐而編修又實舉是科會試第一編修之前舉會試第一者己未有馬編修教思其後又有吳吏部明以來重科第會試第一曰會元鄉試第一曰

解元桐城之解元七人其在前明爲劉教授璽趙都憲
鉞 國朝康熙二十九年江南鄉試同考廖騰燿首薦
桐城劉捷卷主司欲置第二廖不可曰寧擯落耳而是
科第一卽捷兄輝祖也其後九年方侍郎苞亦舉鄉試
第一又十二年廖以御史典江南試以書屬輝祖必欲
得捷而輝祖病阻書不達廖求捷卷不得太息累日及
揭曉則捷已衰然舉首矣捷桐城人寄上元籍又五十
七年爲乾隆戊子張曾敷字譽長舉鄉試第一官貴州
貴西道司空廷璩孫也至光緒戊子而姚永概復領解
焉吳吏部諱貽詠字惠連後戴編修二十四年成進士

少孤家貧值長夏或至日晡不得食未嘗有戚容舉於鄉年四十八矣又十年乃成進士子賡枚與試題名至躍然曰子不先父我固知若遜一籌也選翰林院庶吉士改刑部主事徙吏部性恭謹終日無忤屬文精整莊寫不草書著芸暉館詩文集賡枚後六年亦成進士官監察御史自程太常以下得第者百數十人皆由正科恩科其以大臣子 賜舉人會試中試者一人爲方傳穆勤襄公子也以 召試舉人通籍者三人乾隆四十一年 召試張曾太後知福建歸化縣四十九年 召試張曾獻至山西冀甯道嘉慶十三年龍汝言字子

嘉由寄籍廩膳生應天津 召試 賜舉人十六年復
應五臺 召試授中書十九年成進士 殿試一甲第
一授修撰纂輯祕殿珠林石渠寶笈三編二十一年湖
北正考官二十四年會試同考尋坐校字不慎鑄職道
光元年起用內閣中書授兵部主事進員外未幾卒年
五十二著賜研齋集十二卷本生父諱驥積學不遇好
行任卹子森字書樓同治初官浙江龍游縣率鄉勇剿
賊力戰死先是張文和公子閣學若靄癸丑 廷試
世宗親拔第三文和辭乃改二甲第一并頒 諭旨示
中外仍照一甲例授職爲編修由是縣人遂無有以一

甲三名及第者自張閣學後二甲第一有糧道孫公諱起端字心筠節愍五世孫也少孤貧炊火恆不繼閉戶自精性孝謹無圭角犯而不校嘉慶二十四年進士選庶吉士改部職轉御史出爲貴州糧儲道再攝按察布政清廉自守嘗出死罪囚之誤坐者定讞寬嚴不失洪楊造亂上言黔粵界連宜練精兵合剿並嚴懲居民傳習邪教者皆不果行糧道孫曰慧基字積甫同治七年進士由庶吉士改河南武安令盡心災振性忤懽一言之忤必復惟順母能娛適其意亦以孝稱

馬其昶曰士蔽於科舉久矣光緒三十一年 詔罷鄉

會試興學堂而人心猶若隱慕於此誠積重難返之勢也救時者痛人才由此壞鄙夷之不屑道然兩朝選舉又未嘗不得士余粗述其概亦考吾鄉掌故者所不得略也戴存莊孝廉鄉舉上元梅伯言先生致賀書謂科第不足重人得其人乃爲科第重耳聞嘗披覽邑志見選舉表臚列諸人名氏而迄今顯晦懸絕有不知其誰何者念梅先生言爲之慨然

戴成都劉廣昌楊邯鄲錢蒼梧傳弟六十九

戴公諱宏烈字山民少孤母孫苦節育之工爲詩格律精渾與弟研字導及竝知名人稱龍眠大小戴順治八

年舉人授成都令時兵燹初定成都當省會又併入華陽地繁劇倍他邑土著少秦楚遷民占籍客主違言調劑安輯威惠大行墾田數萬頃戶口歲增千餘訪遺蹟榛莽中修復之民趨令罔後以勞卒官貧不能斂士民輟春巷哭賻金歸其喪

劉公諱鴻都字爾雅號西麓少負雋才事繼母至孝順治十一年選拔貢生授山西廣昌令廣昌土瘠居民稀至則盡力開墾給牛種設義學勵士邊徼荒遠弦誦聲達於衢巷總憲魏敏果公敬禮之致仕歸與里中耆宿相酬唱爲後進矜式焉卒年七十八

楊公諱臣鄰字欽四康熙六年進士知邯鄲縣值軍興
旁午撫綏疲氓甚有惠愛大吏下檄墾荒懼其擾累力
請免行毋憂服除補光山歲饑振糶有法又建義學士
服其教民歌其德擢知光州解組歸足跡不履公庭明
末處士楊先生諱臣諍字古度疑其兄弟行不知親屬
何等也強記博聞箸有禹貢箋禮經會元未見傳本惟
龍文鞭影二卷盛行於鄉塾

錢公諱旆字叔鬯號彭源自少失父以孝友著稱夜讀
恆至雞鳴康熙二十七年進士授四川蒼梧令邊區瘠
荒到官首革苛稅招流移開墾勸民種桑戶滿三百株

者給錢寵異之地故高燥經旬不雨則苦旱親履田隴
相地平窪者爲築堤堰蓄水置桔槔教民用漑行之再
期民稍蘇復乃大起孔子廟置義學數十椽集才彥士
親爲講說月課藝者再遠近慕效大吏奏其績狀將徵
入都遽以疾卒櫬歸道旁有失聲者

馬其昶曰一代革新之際民罹塗炭不有賢吏其能存
乎凋殘之所由復國本之所由固以此迨其後數傳民
生樂利或相與忘之君子曰此其功不在汗馬闢土地
者下余故擇其尤著者書之

姚開化階州峽江傳第七十

姚公諱文燮字經三號羹湖父珠樹先生能詩有高名
諱孫森明天啟閒副榜貢生崇禎八年舉賢良方正爲
龍泉訓導祀鄉賢方宮詹拱乾曰姚子位不副德將畱
餘以餉其後邪及生公而才氣陵轢一時談天下國家
之故恢恢如也順治十六年進士授福建建甯府推官
民俗獷悍睚眦讐殺案積無數公片言立剖未數月囹
圄爲空有方秘盜殺其家數人盜就撫秘乘閒復讐前
官坐秘死公得其情活之未幾有叛民殺武弁案繫千
餘人公疑其獄坐數人罪餘釋去督撫大駭公固言非
叛久之事得已蓋鄉民持械逐盜弁適過盜殺之從騎

後至執爲民叛公固疑之及獲盜訊供盜自伏殺弁也
耿繼茂建藩其下怙勢多不法貸民錢因奪其女妻公
悉使訐發自捐錢償還民婦得歸者百數藩戚某尤橫
或訟之郡郡守懦被侮公自請案治執法加等自是藩
人斂跡時方議修邊海戰船費鉅斂民錢民大譁公密
白上官民得免費秩滿改知直隸雄縣渾河泛溢浸及
城東南隅樓櫓傾圯田廬漂沒暴龍爲害公至作文檄
之水退歲大熟修城築堤造橋以利涉者地近京畿旗
人圈佔膏腴地民勿敢爭公爭之旗人上請於是戶部
司官至牽繩量地繩所定處民不得有公拔佩刀斷繩

辭不稍屈未幾有 詔退地還民雄俗輕死逐利往往
親族促使自裁訐訟不已公敕鄉約死者卽埋葬毋得
生事遂無死者立屯丁爲團長以守望盜賊又請免狐
貢報墾地蠲耗羨減鹽引恤驛政清逃人撫循瘡痍境
內獲安擢雲南開化府同知尋攝曲靖府阿迷州吳三
桂叛陷賊中密與建義將軍林興珠有約林不及期發
事覺繫之獄乘閒遁還安親王軍林先以謀告王王以
聞 聖祖召至京賜對甚詳滇平乞養歸年六十六
母喪毀卒公神爽聰令告歸後以詩畫自娛皆有名隱
居黃蘗山龍眠之奧區也爲梁沼亭軒倚山而樓前爲

耕樂堂營生壙其側自書碑曰黃蘗山樵之墓箸羹湖文集十二卷詩選十卷四六偶存二卷次子士藹字綬仲康熙二十七年進士授編修典試湖廣直隸終左贊善著泳園詩文集贊善子孔鎰字翰擢陝西葭州知州葭州子興溟字南召山東曹州知府曹州曾孫元之左都御史自有傳

階州公諱文熊字望侯父諱孫桀字心甫明天啟二年進士官御史有直節錦衣項震殺妻立訊伏辜執政私震忌之左遷上林院典簿歷吏部主事福建漳南道故相國林釭歿勢豪奪其遺產清還之復爲勢家所中左

遷再起荆南道按察司副使終尚寶寺丞祀鄉賢公康熙六年進士 廷試策問錢穀因舉直省分合數以對且陳轉移之法置二甲授浙江江山縣調蕭山耿逆亂閩浙嚴用師民困輸運公固請撫按折價交納嗣以爲常遷陝西階州知州悉除無名之徵上官督催急吏驕橫公縛其吏撻之降調歸卒祀鄉賢先是蕭山蝗起公移文於神忽大雨蝗盡死又有逸盜自歸獄曰夢父謫我不可累好官其神化如此蕭山祀之名宦復爲祠合祀公與賈公國禎水旱就禱輒應道光七年巡撫劉公昭以 聞奉 旨禦災捍患於民有功封賈昭應伯公昭

感伯亦祀階州名宦子士陞號別峯康熙三十二年舉
人有才名早卒箸空明閣詩集四卷曾孫興泉字問樵
號虛堂諸生以賦落花詩知名人稱落花先生有一枕
窩詩三卷

峽江公諱文焱字彥昭號磐霄龍泉訓導諱孫森子也
年十二賦金陵感懷詩人目爲仙童康熙八年舉順天
試授長洲教諭再聘浙江同考吳中大饑監視粥廠胥
役無一弊漏釐別男女尤盡心醫藥遷峽江令民泣送
塞道峽江征糧舊設里長督花戶城中復設保戶督里
長鄉民輸稅咸主其家歲斂費數千金公一禁革聽民

自輸其弊遂絕郡守下其法列縣行焉其聽訟不事鞭
撻以寬簡爲治長子士鬢字東膠康熙二十九年舉人
母疾刲股和藥弗效哭踊血溢不自覺痛修譜牒篤宗
誼嘗客蘇州見鬻婦以償官逋者傾橐助之復得完聚
又買山埋露棺數百具其急義率如此子四皆工爲詩
孔鉞字鐵也雍正六年舉孝友端方至惠潮兵備道署
江蘇按察使有西塿詩鈔十卷孔鉉字道冲號歸園七
年舉品行才猷至贛州知府有抱影軒心香齋南陔詩
選各二卷叱馭集一卷惠潮贛州政績均可紀弟孔錕
字梁貢號于巢廩貢生有華林莊詩集四卷 四庫書

存目孔振字範治號三崧雍正十一年進士授編修乾隆戊午順天同考拔廬學士文昭京察優等當選以母老遽乞養歸有小安樂窩詩集贛州子興燾字渭川號花龍乾隆三十九年舉人有香巖詩鈔峽江子當雍正乾隆時長房稱盛乃其後遂替矣而次房陝州代興陝州諱甫字勤若於峽江爲玄孫嘉慶初以縣丞投効南河白蓮教起用軍功擢知商城鋤強卻饋歲旱糶振有法大吏檄列縣仿行遷知陝州以勞疾乞歸鄉里義行率首倡焉曾不惜費

焉其昶曰開化列 國史循吏傳幹才優裕兼嫻文雅

嘗輯龍眠詩傳蒐採甚勤猶自病其隘未遽傳書潘蜀藻先生資之以成龍眠風雅又刻通雅古事比及易盪諸書斯誠藝苑之鴻功薦紳之高致已階州峽江同時竝峙姚氏人文蔚然盛矣

江參政彭副使孫東昌傳弟七十一

江公諱皋字在涓號磊齋祖諱之湘字楚望明萬厯四十六年舉人爲四川峨眉知縣有惠政父諱楫字葦渡諸生兩世皆祀鄉賢公中順治十八年進士授江西瑞昌縣遷九江郡丞擢甘肅鞏昌府改廣西柳州府尋爲四川提學副使丁艱服闋補陝西平慶道副使運給軍

綰歷隴塞賀蘭諸險作籌邊九策秩滿遷福建興泉道
參政性喜吟詠以詩擅聲者二十年然公故長於吏能
初在瑞昌河水舊繞城下決徙他去民病沒里居不蕃
公築隄濬壅使復故道城南煙火復盛衣冠之族亦輩
興焉閩楚告警姦民乘閒剽刦大吏議發兵公曰是迫
飢寒耳急則資寇親出誘諭盡解散之守輦昌會王
師入蜀民困於兵乃謁帥約軍士無符信者不得至境
一日有數騎入村漁奪悉縛詣軍斬之由是肅然莫敢
犯及守柳州時新收粵西兵畱鎮本州軍士多掠婦女
哭泣思歸公白大府分別資遣亂離得聚者數百家而

其罷採木事民尤喜稱之柳州山勢峻險斤斧所不及時方修太和殿採木使者且至長老驚恐以謂往代採木南荒震又級地僵仆無算今將奈何公曰無然奉上旨孰敢匿諱亡何使者至公令鄉民前導偕使者視木行數里至絕巘下巨木挺出巖壁馬不能前解鞍步登使者有難色公曰上命也守臣當以身殉短衣持筇扶兩吏先登使者強隨之路絕足半垂外仰視木猶萬仞公顧使者曰何如使者喘息咋舌曰是不可取公曰木具在是賴使者爲上言不可取狀使者還奏得免王纘緒者故巨家子經亂奴四人據其產孱弗能

理寄食僧舍公至寺詰得之捕奴奴入院司爲吏懼獻
金二千乞免公陽受金召吏至出金於廷一訊卽服付
金纘緒奪還其產民歌誦焉其在興泉坐前任事左遷
遂解官歸康熙五十年 上垂念老臣 敕部列奏公
與焉加恩復職卒年八十一祀柳州慶陽名宦箸文三
十卷詩四十一卷仲弟廣譽字繡聞康熙二十四年進
士臨邑令季弟筆字紹文十七年舉人時有三江之目
初楚望公令峨眉有兩生以父讐誣陷瘐獄雪其冤活
之夜夢老父來謝是夕生公後見公成進士始歿年八
十五祀峨眉名宦公視學四川過峨眉嘗謁拜祠下康

熙時江氏又有硯崖先生諱爲龍字我一三十九年進士令宜春雅尚文化刻邑志建義學政教燦然卓異擢兵部主事遷吏部員外著六經圖十六卷 四庫書存目

彭公諱爌字孔哲號粥岑孝子寶之後也祖諱湯有盛德嘗遇盜解囊與之且戒曰速行毋爲人所跡盜感愧公中順治六年進士時兩廣未平甫釋褐卽以僉事備兵蒼梧躬馳炎瘴單騎到官決獄勤敏期年四境威服粵西平敘功遷汝南道副使尋以蜚語罷公起寒素能自建樹撫育幼弟恩義甚備年五十六卒學者私諡孝

靖先生

孫公諱元衡字湘南節愍孫也少孤力學以明經爲山東新城令邑苦水患濬小清河孝婦河以殺減水勢築長隄遏其衝捕蝗振飢全濟甚眾稍遷四川漢州知州一意撫綏流冗還集增戶四千有餘會鑑蠻煽動籌備轉運甚有方略康熙四十二年再舉卓異徙臺灣府同知思以文化被邊俗首建文廟設義塾又置盪纓船以偵礁沙開米禁通利民食秩滿遷知東昌歲比不登買穀數萬石減價糶之民以不飢母喪去官送者塞途歸里起宗祠置墓田與族人同其緩急學宮傾圯復捐金

修焉卒祀鄉賢工爲詩箸赤嵌集片石園詩各四卷赤
嵌集 四庫存目玄孫世昌嘉慶七年進士潯州知府
孫氏節愍後爲盛當康熙時公兄弟行能詩者有安其
先生諱曰書貢生有墨樵詩概鵠峯先生諱曰高字紀
常諸生有意香齋詩集其後乾隆時節愍玄孫又有良
忠選拔生弟良懿良愼皆舉人良慧進士良棻諸生兄
弟孤貧厲學恆枵腹誦詠皆工書時人語曰孫氏五良
而良懿字仲山書名尤著

馬其昶曰孟子以仁術言政此善言也雖有仁心無術
不濟參政鋤姦字良才性通敏其庶幾乎副使蹶起亦

一時之俊也東昌所居職辦惜紀述皆略難觀委備要
可謂績效灼著者矣

左潞安遷江建陽傳弟七十二

左公諱文言字衍初府學生諱暉字峙匡長子於忠毅
公爲曾孫以廩貢考取教習選授直隸完縣令再遷山
西潞安府潔躬率屬問事必究其蘊以此周知閭閻利
病嘗有盜夜持刀入室公據案治事如故神氣閒定盜
逡巡退徐遣吏跡得之一訊具伏箸椒堂文略弟文高
字迓平號二松廩貢生雍正六年舉孝友端方 召見
賜宴并賞給香貂藥餌特授廣西遷江令吏畏其嚴清

縣境接壤上林有樊氏者嘯聚爲亂鎮兵至賊穴地通
 遷江因密召父老告曰賊起上林地也利害所及遷江
 也鎮兵不能分防宜自爲計皆曰善於是會合鎮將伐
 木樹柵掘壕塹困賊而自率鄉勇深入山洞討之賊方
 椎牛醢酒待期約猝相遇驚潰捕斬甚眾三月事平移
 疾歸遽卒有紉椒詩集樺溪文略弟宰字維三號巢松
 康熙五十年舉人知福建建陽縣建陽地磽确賦薄萬
 厯時乃加重國初耿藩從逆民逃徙已而田墾歸之
 佃民而官按籍猶責徵田主其本族及同圖甲之里長
 皆被累前令李六成因每畝報虛荒若干資挹注繼任

者訟其冒免請復征公獨力言大府民困無田之賦奏
請豁減遂爲永利箸忠毅公年譜二卷初峙匡公七歲
能文承父霜鶴先生遺教博綜經史尤篤行誼及生公
兄弟同時并以文學幹濟著稱其後潞安子世壽字山
年雍正七年舉品行才猷授直隸懷來縣遷江曾孫其
章號墨溪舉嘉慶初元孝廉方正子德修字達泉嘉慶
六年進士三從子元烺字保臨道光二十四年進士四
川彭水知縣侍御四世孫世瑯字挹青令羅田羅田民
德之爲生立祠勒石頌焉弟世經字仲孚姚郎中稱其
詩三從弟世容字學冲乾隆三年舉人姚郎中稱其善

經義各爲之序學冲子殷薦字德旗覃思博覽於山川形勢儀器圖象之屬皆究其蘊奧著有甲子新書桐城地脈記修子齋集孝子公光前七世孫德慧字欽敷號石僑舉嘉慶九年優貢授吳江教諭矜重名節文辭博瞻時與閩人鄭兼才並稱二教諭而諸左乾隆中宦達者有武平令光明玄孫宗人府主事諱衢字賡唐十七年第進士官京師與紀文達錢詹事諸公結文社又武平五世孫寧紹台道諱周字逸澗號問莊三十四年進士由檢討轉御史給事中改官浙江坐署布政時失察屬吏左遷子堅吾字叔固一字君胸監生劉海峯先生

其外祖也有至性言論笑語翛然若魏晉人

馬其昶曰忠毅之後自明末以逮我朝嘉道閒文儒吏績時時有聞君子之澤五世而斬今不啻五世矣而孝子侍御武平後又代有興者太公之遺澤遠哉

王受崖左硯農周筆峯三先生傳弟七十三

王先生諱瑜字石仲號砭崖性篤謹人見其言笑舉止類迂生也讀書務明先聖之微旨不慕榮利見人過不言輒閉目自訟人往往化服順治中以歲薦任上元訓導於皇極通書各有詮解每月朔必集諸生會講興起甚眾舊志先生列理學傳別理學於儒林以爲尊之非

通識也今不承用而以左周二先生學派略與先生爲近故類及之

左先生諱正誼字龍媒號硯農郡廩生祖諱光前左氏所稱爲孝子公也先生亦以孝稱事母數十年無忤自少喜讀宋賢書以倡絕學爲事一時問業者比肩門下有四書五經講義及性善致知養氣知言先天圖說諸篇祀鄉賢子之毅字素臣學行不失世守康熙二十一年武科進士直隸宣化府守備族子之柳字箴我以明經司教宿邳二州甚孝養寡母有友旅卒收育其孤如己子再立其家箴我子敬字念臣號慕陶工詩喜游覽

歷三峽峨眉之奇勝有弋雪詩集八卷文二卷論史唾
餘四卷蜀道記五卷蜀話三卷吟閣資談九卷唐詩別
偽十數卷

周先生諱大璋字聘侯號筆峯祖諱天鳳篤內行四子
皆孝謹有父風至先生益研窮性理之學治科舉業必
資之經史百家評定諸籍一時傳習殆徧嘗以四書大
全所輯異同得失紛錯百出爲芟取其要一以朱子爲
宗成四書精言四十卷正義十九卷評論左氏義法辭
令爲左傳翼三十八卷又病學者徒鶩華藻文日工身
心日益喪以爲朱子文與道兼至復選輯朱子古文讀

本六卷皆行於世雍正二年年五十四成進士授湖南龍陽縣築濱湖圩隄時集諸生講學明倫堂諸生素讀其書至是親見講授益樂就之悉紀所聞爲龍陽講義年老請改教職選華亭教諭大府聘修江南通志書成復聘主講紫陽書院其教學者用白鹿洞規則未幾返華亭卒箸修凝堂文鈔六卷同族虛中諱芬斗字汝調紉齋諱芬佩字汝和孿生兄弟也虛中雍正十三年舉人四川敘州知州紉齋乾隆十年進士浙江龍游知縣兩人並以科舉文知名其後又有鶴亭諱大魁乾隆十五年舉人爲泗水令民歌曰公作吏清如水愛卞人如

己子年老請改全椒教諭子捷英號墨仙十六年 高
宗南巡獻文賦荷賜 尚方文綺逾二年充選拔貢生
考取景山教習早世有墨仙稿存齋諱卜政字時亮虛
中門人也從事性命之學淹貫經史學歸熙甫徐思曠
爲文金壇王罕皆極稱之乾隆二十六年進士嘗主講
永平書院卒後門人私謚曰文安著古文十卷詩十二
卷三禮會通左氏詳著史斷四書周易講義

馬其昶曰姚郎中有言諸君皆欲讀人所未見之書某
則願讀人所嘗見書如三先生者可謂能讀人所常見
書者矣周名稍顯王左當鼎革初潛修樂道倘所謂碩

果不食者邪噫風會隨世移易宋儒義理書在今日又
恐翻爲人所罕見者矣

諸方張葉傳第七十四

方位白先生諱中通號陪翁藥地老人仲子也郡諸生
考授州同知與兄田伯弟素伯并有高名田伯先生諱
中德號依巖素伯先生諱中履號合山當馬阮亂政黨
禍起田伯年十三撾登聞鼓訟父冤不報父出亡偕諸
弟徒步追從母病嘗洩以驗差劇箸古事比十三卷遂
上居稿十卷其他未刻者尚數十種位白先生箸數度
衍二十四卷音韻切衍二卷篆隸辨從二卷心學宗續

編四卷陪翁集七卷續四卷初藥地老人廬墓合山時
重編周易時論閒衍極數示諸子位白退卽變數十圖
以進老人喜甚因益考求天人律厯音韻六書之學發
明勾股出河圖加減乘除出洛書後玩泰西書乃合筆
籌珠三法窮差別於九章已復得尺算法於其弟精思
數日盡其變及書成老人書而示之曰漆園天下篇云
明於本數係於末度吾謂數自有度易曰制數度以議
德行神自無方準不可亂舍日無歲無內無外秩序變
化原同一時因其條理而付之中節之謂度故曰一在
二中物自獻理誰能惑我然則數乃質耳度也者其大

本之時幾乎泥於數則技通於數則神汝旣知數卽可
以此通神明類萬物矣專精藏密勉之勉之於是遂以
數度衍名其書又嘗與廣昌揭暄論難日輪大小得光
肥影瘦之故及古今歲差之不同須測算消長以齊之
一晝夜人一萬三千五百息每息宗動天行十萬里有
奇別錄爲一書曰揭方問答次子正珠字浦還康熙三
十一年以明經 召對問律呂之蘊 示以中和樂諸
法器進父中通數度衍並自箸乘除新法奏對稱 旨
兄正琫字鞞上弟正琇字揚光正璆字序左皆敦行力
學知名於時素伯先生天才捷悟少隨父崎嶇嶺嶠時

人擬東坡之有蘇過晚築稻花齋於湖上離世遠俗嘗
曰吾所著惟古今釋疑一書討論經史禮樂法度以及
厯象算法聲韻醫藥無不備頗自謂無謬於道其後張
文端公以其書十八卷進 御子正瑗字引邁號方齋
康熙五十九年舉人官至陝西潼商道以幹濟稱嘗春
月攜賓從泛舟出關觀桃花暮夜關未閉坐効免歸署
所居曰瀟灑園箸方齋補莊連理山人全集潼商子張
盤字弗諼號新莊諸生淹通經史張登字芸墨號楮堂
乾隆十七年舉人令平羅濬桃花渠溉地數萬頃及改
官主事仍畱治一年以竣其役新莊子賜豪字染露三

十年舉人令清溪莅官四十日卽以病自劾歸有味佳
居詩文鈔田伯先生子正璫字芥帆令五臺署繁峙又
署朔州有清操 聖祖臨幸臺山寵錫 宸翰正璫字
致士性敏萬言過目能背誦正玠字弢采雍正二年舉
人選無極令縣有木道溝沙流壅塞爲疏決之民得溉
利擢福州同知以循良著稱

張先生諱裕葉字侍喬號華巖乾隆六十年副榜貢生
爲歙縣教諭滁州學正撰開方捷法凡算中積求邊者
不過一槩一加而所得之邊與古法等又以己意製燥
濕表能預知晴雨其學通經史旁逮藝術雜家精醫方

施治輒效閒推日月五星天首天尾北極出地決人命
數多奇驗年五十三卒著爾雅補註通雅刊誤開方表
各若干卷又余晉齋諱熙著八線測表圖說一卷遵
數理精蘊發明勾股和較割圓八線六宗三要諸法括
爲圖說主於明淺以便初學 四庫書存目

葉先生諱棠字漢池號松亭生道光時獨究心天文輿
圖算數不喜爲科舉學邵陽魏默深聘修海國圖志因
得從歐洲人士討論聞見益肆其自爲渾天恆星赤道
全圖天元一術圖說已刊行數理闡微勾股論經解藏
於家縣學生鄭君福照字容甫傳其學嘗以所作勾股

術演開方論略是正海甯李壬叔李固算學大師也覽其書善之又嘗學詩於方植之先生雅潔有家法

馬其昶曰算數之術後起益精吾縣在前唯位白所撰四庫著錄又胡襲參司業從宣城梅徵君問難有梅胡問答嘉道以還張葉稍顯科學未興孤士閉門厥難倍哉非由天悟未有能與於斯者也今學堂普設自勝衣乳臭莫不攘臂言算學矣

方氏三詩人傳弟七十五

方先生諱文字爾止號明農一號喆山萬厯進士戶部主事諱大鉉子也當明之季以諸生及從子密之皆聲

振天下先生性亢爽有天趣每見人詩輒改竄其人不
樂不顧也嘗自以生命壬子命畫師作四壬子圖中陶
淵明次杜子美白樂天皆高座而已呈詩卷偃僂於前
其詩任性靈雖民謠里諺塗巷瑣事皆以入詩箸螽山
詩文集五十卷說文條貫十八卷一時如施愚山孫豹
人王阮亭諸公皆盛相欽重其後方氏以詩名尤著者
二人一曰南堂先生諱貞觀字履安箸南堂詩集八卷
一曰息翁先生諱世舉字扶南箸春及堂詩集二卷江
關集一卷兩先生皆少詹事坦菴曾孫而孝廉章鉞孫
也坦菴諱拱乾字肅之崇禎時官少詹事 國朝以薦

起補宏文院學士尋除少詹平生篤交誼嘗急人難晚年謫甯古塔撰絕域紀略號甦老人甦老人七十自壽曰老人問卿子七歲能屬文爲詩長登進士官翰林至少詹事娶相國女至今猶其哺糜生兩女六男亦皆掇科名男女孫百幾十人老人所徼於造物可謂厚矣其自喜如此詹事長子元成字孝標號樓岡順治六年進士官侍讀學士次亨咸號邵村順治四年進士官監察御史坐科場案謫甯古塔王阮亭稱賞其詩尤工書畫人得其寸縑珍若璆寶兄弟並知名次育盛膏茂章鉞亦皆舉於鄉次奕箴奕箴孫世儁乾隆初進士官湖南

巡撫子保升翰林院庶吉士南堂先生胸次瀟然布素
終身若忘其爲華胄者善行楷書與汪退谷王翦林盧
雅雨友善孫文定公嘉淦在翰林時從之學詩先生詩
初近張籍王建後浸淫貞元大厯閒以南山集被累出
關放歸後詩益平淡乾隆丙辰 詔開博學鴻詞科文
定首舉先生以老不就試賦詩謝之而是時息翁先生
亦舉詞科謝不就息翁先生學博而性疎曠少遊京師
事秀水朱竹垞多見古書祕本名日起先生爲詩好自
改竄晚年定稿少作無一存者酷嗜韓詩爲韓詩編年
箋注十二卷又有李義山詩注漢書補注世說新語補

注年八十餘猶於廣座中伸紙濡墨頃刻賦數十篇精
采不少減其從子宜田撫浙時請之不往復書曰野人
方與諸朋舊劇談高會掀髯鼓掌以爲樂女乃欲爰居
享我邪竟不肯往

馬其昶曰三先生之詩不必同要其有以自樂極困阨
不悔則三先生者皆然詩之爲道至精其出也一肖乎
人彼其中或且熱而不盭吾未知其詩何如也然則三
先生之賢亦遠矣

潘木崖先生傳弟七十六

潘先生諱江字蜀藻號木崖少孤母吳氏高節博學箸

有松聲閣集先生生而天才雋妙十歲試文郡邑羣士
推爲聖童後益博極羣書厯遊齊岱京楚與海內名流
相結主盟壇席者三十餘年康熙十八年舉鴻博以母
老辭後兩徵遺逸皆不就隱居北郭之河墅年八十四
卒張文端公題其碑曰詩人河墅先生之墓其詩法白
香山亦時出入錢劉耽耆風雅尤畱意兩朝文獻遇人
一韻之工稱賞不容口戴編修名世初未知名先生奇
其才悉發藏書資之卒傳其學先生輯龍眠風雅六十
八卷續二十八卷桐城鄉賢實錄一卷木崖詩文集五
十餘卷續集十五卷又六經蠡測字學析疑詩韻尤雅

記事珠均佚子仁標仁樹孫義炳皆能世其學同時詩人又有祝樸巢李芥須二先生樸巢諱祺字山如文端師事之家貧得錢卽償書直匿名跡遠權勢所爲詩博奧蕭遠有樸巢集芥須諱雅字士雅高祖諱春字初陽景泰元年舉人授應山令治行第一行取御史先生性卞急詩文沈酣宏肆亦文端所敬禮也寄籍廣東生員選拔授江西崇義教諭歸築東皋草堂於東郭外無子依女以居耆酒而不能恆得因仿陶潛顏真卿故事作乞米行投同志時應者十許人程太常兼金代秬復作後乞米行以謝之年八十二卒臨卒乞潘先生河墅以

葬遂葬河墅後潘先生又瘞鶴於墓左謂其孤高清潔
與鶴宜也嘗偕友人何存齋編龍眠古文一集二十四
卷鄉先輩詩文得不泯者潘李何三先生力也存齋爲
布政公孫諱永紹字令遠廩貢生與毛西河宋漫堂爲
友

馬其昶曰當李何輯錄時自言家藏文集無慮千種及
道光中徐六襄先生編桐舊集已謂按目而稽十亡七
八矣況更兵亂寧可復問邪而龍眠風雅古文一集猶
幸有傳本施愚山學士謂全集繁而易失選本合而易
行信哉是蓋後死者之責也夫

張湖上先生傳弟七十七

張湖上先生諱載字子容文端公仲兄少倜儻有風槩
明季諸生年四十輒棄去隱居松湖之隈濱湖田數十
畝宅一區門臨大泊可畜魚歲發荷花數萬挺長隄左
右接山麓隄外爲大湖當鼎革初張氏方貴盛而先生
獨率妻子躬耕湖上與世相忘家纔足稻梁經年不見
賓客不入城市或婚嫁將會姻親輒作惡曰予豈耐衣
冠而與人拱揖邪惟疎節闊目存大意而已晚年以田
付諸子自以漁爲業每歲十月後湖水稍退則集莊農
具舟楫結罾網卽以魚爲雇值先期大設酒饌以勞之

妻治具僮僕持壺觴先生勸醕茆檐之下談笑移時各盡懽去性至孝母遺手繡佛像構一亭事之有僧詣門募施笑曰彼以我佞佛邪此吾親也吾故事之性不能多飲常微醺體貌頎然爲書學鍾繇至老目視不衰嘗作輿圖詳沿革方寸中字數百小於蟻腳文端時年五十自謂不能辨也鄉人化其行松湖數十年無盜每貽文端書輒勸以歸休年七十有八與妻同時卒子廷珠自稱松山樵者高達有父風卒年八十

馬其昶曰文端在朝時時有江湖之思尤喜於公卿閒述先生行事然吾竊怪其不慕榮利可矣卽何至衣冠

聚會亦屏不與豈其性真不堪邪抑有所不得已於中者而姑託是以逃也其殆以明之遺民自處邪嗚乎賢已

張獅崖李古塘吳伯颺三先生傳弟七十八

張獅崖先生諱度字齡若一字仲友世居拔茅山與張太傅不同祖慮無以別世族自署曰蓬蒿舊家事親孝介特寡合淡於世榮書畫皆絕人手鈔至二三千餘紙著蟋蟀窩詩集十卷姚端恪公爲諸生時延禮賓塾課其長子巖饑或日餽不具食課誦自若其後諸子生次第從受學二十餘年交如一日端恪五子二女不名他

師嘗稱曰賓無二主主無二賓張先生殆有道而隱於
教授者不然其才藝術業如此何乃終爲一家一塾之
師哉世之爲師者視其塾若傳舍弟子亦數更其師若
舉棋聞張先生之風可以興矣李古塘先生諱憲字長
康與獅崖同時工書善畫平淡高逸詩學東野閬仙家
無儋石之儲怡然自得陸東洲諱振山水花卉人物人
爭傳寶卒年八十八舊志以冠 國朝藝術之首今不
見其所作其後道光時有吳伯鵬先生諱榮字牧臬諸
生性和介人與之處皆化服焉家貧以繪事遊客公卿
間不立資產得一金輒以施貧乏囊橐常虛或詐取其

金雖覺不以悔也年老益困姚按察光布政吾家工部
通守諸公月日有餽非其人不受其畫自以意得於山
水不專事摹擬縣人藏者多有時雜僞跡惟視款字蒼
勁以辨之咸豐後惟張新安諱世祿字二谷以字行始
工花卉後更肆力山水張故顯族家中落老年謁選得
新安令

馬其昶曰吾縣以畫名者舊志明成化時有丁南羽諱
雲鵬其畫佛盛傳於世南羽實休甯人舊志誤也我
朝推方邵村姚羹湖然世不恆見其跡見者必賞異以
爲大家云而張閣學花卉姚總憲折枝竝工絕其位望

皆通顯矣余略取布衣之士類記之於此